

Memanggil Hantu


Penulis Jemi



Assalamualaikum para pembaca. Ini kisah benar berlaku pada **diri** aku ketika di *tingkatan 6 bawah* — tahun 1995 di Melaka. Aku akan gunakan nama panggilan rakan-rakanku yang sebenar dan setakat saat ini mereka masih hidup serta **cemerlang dalam kehidupan masing-masing**.



Seperti **golongan muda remaja** ketika itu berumur belasan tahun — aku dan beberapa rakan tertarik **kepada** ilmu persilatan dan aktiviti-aktiviti di luar pemikiran normal. Ketika di *tingkatan 6* itu juga aku dan beberapa rakan **kerap membuat ulang kaji pelajaran secara bersama** setiap malam sampai pukul 2:00 **hingga** 3:00 pagi — **terkadang terlajak hingga tertidur di rumah rakan**.

Sudah **agak lama juga** topik **perbualan** aku bersama rakan-rakan adalah **topik cara-cara memanggil**  **hantu**. Setahun **hasil daripada** perbualan terutamanya **pengetahuan Sharin** yang paling **banyak mengetahui perkara paranormal ini telah berkongsi cara-cara memanggil hantu**.

Antara kaedah yang boleh digunakan untuk memanggil hantu – entah ya atau tidak – wallahualam – jangan cuba buat 😊 Ya!

Dalam entri ini tanpa berselindung aku tuliskan secara terperinci kaedahnya untuk elakkan ada pembaca entri ini meloncat-loncat menuduh aku menulis cerita rekaan...

- 1) Potong anak *pisang emas* dan balut seperti kain kafan.
- 2) Sediakan telur mentah – telur ini untuk jamuan hantu – cara ini susah – hanya bomoh yang betul-betul bomoh sahaja boleh realisasikan ritual menjamukan hidangan kepada hantu dengan cara ini.
- 3) Sediakan lada hitam – lada ini untuk memagar kawasan – tabur secara berselerak dan duduk di atas selerakkan lada yang sudah ditabur.
- 4) Petik bunga *kemboja* di waktu Maghrib.
- 5) Ambil tanah kubur dan tanam *pisang emas* yang sudah dibalut dengan kain kafan menggunakan tanah kubur ini – selepas itu bacalah jampi ini: *Jumjumatun aku seru kau wahai kongkalikung – janganlah kau kelentong – tong tong tong – berhentilah meloncat-loncat atas tong.*

Entah macam mana, satu malam selepas mengulang kaji pelajaran – secara sengaja anak muda berlima ini tidak terkecuali aku – cubalah memanggil hantu. Malam, selepas aku, Am, Zam, Ateng, dan Sharin selesai mengulang kaji pelajaran di rumah Am – anak muda berlima ini cuba melaksanakan ritual memanggil hantu.

Memang kena pada masanya memilih 🏠 rumah Am sebagai tempat untuk memanggil hantu. Bapa Am telah berhijrah ke luar negara dan rumah papan ayahnya ini bersebelahan dengan rumah nenek Am – cucu nenek yakni Si Am ini pula duduk bersama neneknya – jadi rumah ini telah kosong bertahun-tahun lamanya – keadaan rumah ini agak baik kerana masih ada orang tengok-tengokkan. Rumah ini berdaun *pintu empat bersaiz dada anak-anak muda* – ia memang dianggap daun pintu moden ketika itu.



Seperti rumah Melayu Melaka yang lazimnya dapat dilihat di Jasin – bahagian depan dan bilik berada di bahagian atas, manakala dapur serta bilik air – nun di bahagian bawah belakang rumah. Sekeliling rumah Am banyak ditumbuhi pokok *cempedak*, bahkan ada

sebatang dua pokok besar — pokok *kemang* kot — maaflah aku tak arif sangat nama-nama pokok — justeru dua pokok *kemang* ini menyebabkan rumahnya nampak suram — punyalah pemalas Si Am ini — dibiarkan dedaun kering berselerak di sekeliling rumah ini — dah nampak semak bebenau halaman rumahnya — tapi menuduh Si Am ini pemalas, rasanya tuduhan ini boleh dianggap tuduhan lucah kerana *tanah Melayu* ini sejak *kunfayakun* memang ditetapkan menjadi *hutan hujan tropika* — tentulah dedaun kering yang berguguran ini adalah sifat semula jadi *hutan hujan tropika* — memang lucah menuduh Am ini pemalas tanpa fahami sifat *hutan hujan tropika* — *tanah Melayu* ini bukan gurun berpasir-pasir seperti kubur Firaun di Mesir — hawau!



😊 Okay berbalik semula kepada ritual memanggil hantu — pabila lima anak muda ini berada di rumah Am — Si Sharin ini tentulah menjadi kepala dalam ritual ini — dia pun memberikan sedikit taklimat sebelum melakukan upacara memanggil hantu.

Aku sebenarnya bukanlah berani sangat — nak membantah ritual ini — kang tak pasal-pasal aku disingkir dari keturunan Kasturi — dalam berkira-kira

nak mengiyakan atau bagi alasan — rupanya dia orang berempat semua sudah sebulat suara bersetuju. Paling mengujakan, Si Sharin dah siap-siap bawa bunga *kemboja* dari kubur.

Emi : Patutlah datang lambat Si Hawau ini.

Benakku terus menggetus, melihat Si Sharin mengeluarkan bunga *kemboja* daripada begnya.

Bukan sahaja bunga *kemboja*, Si Sharin ini siap bawa tongkat *buluh tumpat* — katanya...

Rin : Buluh ini boleh buat pelindung diri.

😞 Alahai... di antara percaya dan tak percaya jer — ikutkan benakku, nak ajer cepat-cepat aku ambil terus ketuk dahi Si Sharin ini menggunakan buluh yang dibawanya — melihat *buluh tumpat* ini kononnya boleh dijadikan pelindung diri — hingga dunia ini kiamat aku tak percaya kepada dakyah *buluh tumpat*.


Sebelum mulakan ritual sekitar jam 10:00 malam — Sharin menerangkan beberapa syarat dan petanda hantu datang menghampiri kepada kita berlima ini. Tanda-tanda hantu itu datang untuk sepanjang tempoh ritual...

- 1) Tiada sebarang bunyi bising — betul-betul senyap sunyi.
- 2) Tiada cahaya.

Syarat sepanjang tempoh melakukan ritual memanggil hantu itu datang...

- 1) Awal-awal tidak boleh memakai sebarang pelindung diri.

Tanda-tanda hantu itu nak/sedang datang bertandang atau menghampiri...


- 1) Bunyi burung *tiung*.
- 2) Bunyi cicak berdecit-decit — bersambung-sambung — bermula decitan daripada seekor, disambung cicak yang lain, kemudian disambung lagi decitan oleh cicik yang lain.
- 3) Akan ada bunyi ketukan/cakaran di kawasan sekitar tempat ritual. Kalau tempat ritual itu di kawasan terbuka seperti di tengah-tengah padang pasir di Mesir — tiadalah bunyi ketukan/cakaran — serta-merta hantu itu terus datang sergah:  *Argghhhh! Aku lapar! Aku nak makan daging keldai!*

Maka bermulalah ritual memanggil hantu diketuai oleh Sharin di bahagian ruang tamu. Sharin membentangkan tiga lapisan surat khabar **Berita Harian** — seterusnya meletakkan *pisang emas* berbalut kafan dan ditabur tanah kubur hingga menimbusi keseluruhan pisang tersebut.

Selepas $8 + 8 = 16$ kali Si Sharin membaca jampi *kongkalikung meloncat atas tong* – tunggu punya tunggu punya tunggu – dari pukul 10:00 menginjak ke pukul 11:00 – tiada apa-apa yang berlaku – kemudian menginjak ke pukul 12:00 🤪 *Jeng! Jeng! Jeng!* – pundi kencing aku dah penuh – aku meminta izin nak pergi pancut – Sharin tak bagi aku menyalakan sebarang lampu sepanjang menuju ke tandas untuk memancut, bahkan ketika melakukan ritual dalam gelap inipun cakap macam pengantin baru nak bersanggama kali pertama – dapur di belakang punyalah gelap...

Emi : Gila agaknya Si Sharin nak aku meraba-raba sampai ke belakang – buatnya aku terpegang rambut 😞 aduh mampus aku.

Benakku terus menggetus kerana Sharin berkeras tak mahu sebarang nyalaan lampu. Disebabkan sudah melakukan ritual dari awal – aku pun tak nak jadi punca ritual ini gagal – aku ajak Si Am ini teman – dia pun ikut. Diam-diam aku suruh Si Am ini nyalakan lampu suluh kecil.



Jalan ke dapur melintasi dua bilik di rumah Am ini 😓 Ishhh... bunyi papan lantai dipijak oleh aku dan Am

berkeriut-keriut menambah lagi denyutan kantungku menggelegak hampir meledak pundi kencingku ketika berkeriut-keriut berjalan.

Sampai dapur, meluru terus aku masuk ke bilik air — aku sorang jer memancut — aku ajak Am beregu — dia tak mahu — apa nak ditakutkannya entah? Bukannya aku nak suluh konek dia!

Masa aku kencing — aku pejam mata — kot-kot takut 😬 ternampak makhluk menyeramkan beregu memancut di sebelahku.

Selesai memancut, aku dan Am balik semula di ruang tamu — Sharin memberi isyarat — rupanya semasa aku dan Am berjalan ke bilik air — ada bayang-bayang di tingkap nakoh turut mengekori aku dan Am ke dapur.

Selepas aku memancut, semua terus menunggu dan menunggu. Seketika terdengar sayup-sayup bunyi burung tiung seperti Sharin katakan tadi ketika memberi taklimat dan sesekali cicak berbunyi, tapi tak ada tanda-tanda kewujudan fizikal Si Hantu.

Aku rasa di sekitar jam 1:00 pagi, ketika itu aku dengar dengkuran Si Am, Ateng, dan Zam — aku pula tak boleh tidur — terkebil-kebil. Tiba-tiba bunyi burung tiung tadi kembali bergema lebih kuat diikuti deretan bunyi cicak — kemudian dinding papan di ruang tamu kedengaran seperti dijentik-jentik hampir sekeliling rumah — beberapa minit kemudian diikuti goncangan

yang sangat kuat di daun *pintu empat* di ruang tamu tempat ritual dilakukan 🤩 ketika ini aku yang sedang baring — pejamkan mata seketat-ketatnya sambil membayangkan daun pintu itu dihantuk-hantuk menggunakan kepala oleh makhluk berbungkus — *Hantu Pocong!*



Selama beberapa minit gocangan itu diselang-seli dengan dengkuranku bertiga — Sharin!? Aku tak tahu — aku membuka sedikit kelopak mataku secara kecil usyar Si Sharin — tangannya atas perut — entah dah jadi jenazah ker mamat ini — entah dah tidur mati ker mamat ini — aku pun tak tahu.


Otakku cepat-cepat membuat keputusan, kalau pintu pecah — aku capai buluh tumpat Si Sharin ini — bukan kerana aku percaya buluh ini boleh melindungi diriku — aku akan gunakannya sebagai senjata jika terpaksa berkuntai ☁️ Wacha! Wacha! — melibas-libas buluh ini ke dahi hantu itu.

Pada masa pintu masih bergoncang aku baca juga ayat-ayat suci untuk pelindung diri — iyelarr buatnya aku seorang jer terpaksa melayan Si Pocong ini bertandang — tak bolehlah percaya kepada buluh tumpat melebihi kemuliaan ayat-ayat suci Al-Quran.



Setelah habis aku baca ayat-ayat pelindung diri, tiba-tiba keadaan jadi sunyi sesunyinya — bunyi burung *tiung*, cicak, cengkerik tak ada, *hanya* ada bunyi dengkur kawanku yang bertiga *ini* — mata aku jadi sangat berat dan tertidur.


Pagi esoknya aku tanya *kepada Sharin berkenaan gangguan serta kedatangan Si Pocong* kot pada malam semalam — Sharin kata...

Rin : Aku sedar sama macam kau — *tapi aku buat-buat tidur dan terus-menerus tanpa henti baca doa pelindung.*

 *Apa kepepek larr Si Sharin ni — aku ingatkan dia ni berani sangat — rupa-rupanya dia buat-buat tidur — hawau betul larr!*

Kalau aku tahu malam semalam Si Sharin ini buat-buat tidur — tidak syak lagi *buluh tumpat* pasti makan tuan.

Rakan aku yang tertidur terujalah *mendengar cerita aku dan beriya-iya nak merasai situasi mendebar* *kan ini*  *jimbit punya budak — sedap-sedap kau tidur, lepas itu nak ajak aku merasai situasi ini sekali lagi*  *hampeh punya kawan.*

Esok malamnya aku tak keluar *rumah* sebab ada urusan keluarga — dia orang berempat buat sekali lagi *ritual memanggil hantu — kali ini menggunakan*  *telur mentah sebagai jamuan hantu — cara ini memang susah*

kerana bomoh yang betul-betul bomoh sahaja boleh merealisasikan ritual ini.

Emi : Kenapa mesti bomoh — manusia bukan bomoh tak boleh ker?

Bukan tak boleh — manusia bukan bomoh boleh juga lakukan ritual ini, bak kata bidalan Melayu — untung batu tidak mustahil batu boleh timbul, rugi buih tidak mustahil buih boleh tenggelam.

Untung ritual menjadi — tidak mustahil *jembalang* yang melata di *Felda Jengka, Pahang* — datang bertandang hanya kerana bomoh menghidangkan 🍌 tahi sebagai anjak. Rugi ritual tak menjadi — dah upah Jamie Oliver hidangan anjak lima bintang — 88 ekor 🐷 babi panggang — belum tentu anjak lima bintang ini menjanjikan kedatangan seekor *jembalang*.



Disebabkan tiga orang kawanku ini masih tak puas hati kerana semalam tak merasa debaran kedatangan hantu — mereka ini bertekad lagi nekad melakukan ritual menggunakan 🔍 telur mentah.

Ada larr cerita-cerita dari dia orang selepas cuba melakukan ritual menggunakan telur mentah — terbukti ritual mereka gagal kerana tak merasai seperti yang pernah aku rasai ketika ritual menggunakan *pisang emas*

berbalut kafan ditimbus dengan tanah kubur serta bacaan jampi-jampah *kongkalikung meloncat atas tong*.

Aku jangka, ketika mereka cuba melakukan ritual telur mentah — dia orang memang tak tidur — cekal bersengkang mata, tapi Sharin secara diam-diam — awal-awal dah buat pelindung siap-siap — itu sebab kesan debaran tak mencapai tahap maksimum. Al-maklumlah, kononnya kita orang ini berdarah *pahlawan Melaka* — takkanlah bangang sangat Si Sharin ini nak bersilat depan hantu, sedangkan ayat Qursi lebih mujarab.

